

Skýrsla stjórnar Pírata 2020-2021

Nýtt fyrirkomulag stjórna og nefnda Pírata

Vorið 2019 var ráðist í endurskipulagningu í opnu ferli og var tillagan; Lagabreyting um stjórnir ráð og nefndir á vegum Pírata, samþykkt í febrúar. Nýja skipulagið tók gildi frá aðalfundi 2020 en í því er verkefnum framkvæmdaráðs skipt niður á þrjú minni ráð; Framkvæmdastjórn, Fjármálaráð og Stefnu- og málefnanefnd. Markmiðið með skiptingunni var að skýra ábyrgðarsvið og hlutverk ráða og nefnda, að tryggja að ábyrgð og vald haldist í hendur og að dreifa ákvörðunarvaldi með áhrifaríkari hætti.

Framkvæmdastjórn

Framkvæmdastjórn Pírata setur stefnu um rekstur félagsins og annast almenna stjórn og rekstur þess að svo miklu leyti sem hún er ekki í höndum aðildarfélaga. Framkvæmdastjórn ræður framkvæmdastjóra félagsins.

Fjármálaráð

Hlutverk fjármálaráðs er að tryggja gegnsæi, valddreifingu og vönduð bókhaldsvinnubrögð í fjármálum. Ráðið ber ábyrgð á að gera fjárhagsáætlun, setja og fylgja eftir verklagsreglum um fjármaumsjón félagsins og sjá um fjárveitingar til aðildarfélaga.

Stefnu- og málefnanefnd

Stefnu- og málefnanefnd er aðilum innan Pírata til aðstoðar varðandi stefnumótun og málefnastarf innan flokksins. Meðal verkefna nefndarinnar er að skipuleggja Pírataþing, en það eru fundir með stærra sniði þar sem vinna skal að stefnumótun og málefnum í breiðu samráði félagsmanna. Í aðdraganda alþingiskosninga sér nefndin um að útbúa kosningastefnuskrá byggða á samþykktum stefnum Pírata.

Skýrsla frá framkvæmdastjórn félagsins

Framkvæmdastjórn Pírata 2020-2021

Á aðalfundi Pírata 2020 sem haldinn var á netinu dagana 26. og 27. september voru Gamithra Marga, Björn Þór Jóhannesson og Vignir Árnason kosin í framkvæmdastjórn. Á fyrsta fundi stjórnarinnar var ákveðið að Gamithra, sem lenti í 1. sæti, tæki stöðu formanneskju, Björn Þór yrði gjaldkeri og Vignir ritari stjórnarinnar.

Pírataspjallið og breytingar á því - Pírataspjallið 2.0 verður til

Framkvæmdaráð Pírata 2019-2020 eftirlét framkvæmdastjórn 2020-2021 það viðamikla verkefni að betrumbæta Pírataspjallið, sem hefur verið umdeildur vettvangur skoðanaskipta og umræðna meðal Pírata og gesta spjallsins. Af viðtölum stjórnarinnar við starfsfólk, umjónarmanna spjallsins og almenns félagsfólks varð strax ljóst að margt þurfti að bæta við Pírataspjallið til að það yrði vinsamlegri og uppbyggilegri vettvangi til skoðanaskipta.

Vinna framkvæmdastjórnar hófst á því að ræða við starfsfólk flokksins, þingflokk og sveitastjórnarfulltrúa um hvað þeim fyndist að Pírataspjallinu og hvaða úrbætur væru mögulegar. Þá átti stjórnin mjög gagnlegt spjall við Jón Þór Ólafsson, þingmann Pírata, um hvernig væri best að haga ferlinu við að ná fram breytingum á spjallinu sem almenn sátt væri um. Hann lagði til að fá félagsmenn að borðinu og halda nokkra félagsfundi þar sem tillögur væru mótaðar og síðan lagðar fyrir félagsmenn í kosningakerfi Pírata til samþykktar.

Vinnan hefst við nýtt Pírataspjall

Í samræmi við þær ráðleggingar hófst vinnan að nýju Pírataspjalli fimmtudaginn 19. nóvember, þegar haldinn var félagsfundur um Pírataspjallið og skipaður starfshópur um það í kjölfar hans til að vinna að úrbótum og nýrri uppfærslu á reglum Spjallsins. Félagsmenn þar voru sammála um að staðan væri óviðunandi, tröll og niðurrifsmenn leggðu Spjallið undir sig þannig að umræðan væri ekki uppbyggileg og til þess fallin að fæla annað fólk frá þáttöku þar. Þá var talað um að gera breytingar svo að Spjallið yrði aftur Pírata, að fólk liði vel þar og gæti tjáð sig án þess að eiga það á hættu að verða fyrir fordómum vegna kyns síns, uppruna, kynhneigðar eða annarra greinandi þátta. Leiðir til úrbóta sem voru ræddar var að koma því á að samþykkja þurfi pósta inn á Spjallið (e. post approval), annarra en þeirra sem eru með stjórnendaréttindi í hópnum. Þá var líka rætt um að hafa hámark á fjölda þeirra pósta sem einstaklingur gæti birt daglega. Líka var rætt um að póstar þyrftu að uppfylla ákveðin skilyrði til að vera hæfir til birtingar, ákveðinn orðafjöldi, byggðir á traustum heimildum, efni póstsins innihaldi ekki niðrandi efni eða annað sem gæti talist til niðurrifs. Allir póstar ættu því að hvetja til uppbyggilegrar og yfirvegaðrar um málefni sem tengjast Pírötum eða stjórnmálum.

Á þessum fundi var óskað eftir sjálfbóðaliðum til að taka þátt í starfshópi um endurbætur á Pírataspjallinu og sá starfshópur fundaði fyrst mánudaginn 30 nóvember og fjallaði um tilgang og eðli spjallsins, auk þeirra úrbóta sem komu til greina. Þá var ákveðið að hluti hópsins gerðu drög að stefnu og reglum fyrir Spjallið sem starfshópurinn gæti fjallað um. Hópurinn ákvað að funda næsta

mánudag 7. desember á sama tíma. Hópurinn skrifaði síðan tillögur sem urðu að stefnubreytingartillögu fyrir Pírataspjallið, sem lögð var fyrir félagsmenn í Kosningakerfinu 17. desember 2020. Atkvæðagreiðsla hófst síðan 24. desember kl. 21:00 og lauk þann 31. á sama tíma, tillagan var samþykkt með rúmlega 65 % meirihluta en 77 greiddu atkvæði.

Pírataspjallið 2.0 verður til

Vegna óviðráðanlegra tafa þá komu breytingar á Pírataspjallinu ekki til framkvæmda fyrr en 26. mars 2021 eftir góða kynningu á Facebook og Pírataspjallinu. Þá hlaut spjallið nýtt nafn, Pírataspjallið 2.0. Þessar tafir skýrst m.a. annars af önnum hjá framkvæmdastjórn og starfsfólki flokksins en prófkjör vegna komandi þingkosninga stóðu yfir á þessum tímabili. Vegna þess hversu seint tókst að kynna Pírataspjallið 2.0 til sögunnar þá seinkaði jafnframt endurskoðun á árangri breytinganna sem átti að fara fram 1. apríl.

Endurskoðun á árangrinum

Þessi endurskoðun fór því fram 5. maí í staðinn með félagsfundinum: Pírataspjallið 2, hvernig gengur? Þar voru skiptar skoðanir meðal fundargesta en flestir voru á því að póstarnir væu fjölbreyttari en áður og almennt eru póstarnir betri en áður þó að það séu undantekningar á því. Stjórnandi spjallsins útskýrði líka að póstar sem eru án texta, falsfréttir og annað efni sem er illa rökstudd sé fjarlæggt, sem verður að teljast jákvætt. Þar kom líka fram að það sé enn mikill vinna að ritstýra umræðum á Pírataspjallinu 2.0 og hugsanlega þurfi að fjölga stjórnendum til að ná utan um verkefnið.

Þann 5. maí var enn tiltölulega stuttur tími frá breytingum Pírataspjallsins yfir í Pírataspjallið 2.0. Það er því líklega gott að meta árangurinn af breytingunum aftur eftir kosningarnar í haust og ákveða þá næstu skref í samstarfi við félagsfólk Pírata. Það er væntanlega verkefni næstu framkvæmdastjórnar að halda utan um þá vinnu.

Undirbúningur kosninga og kosningastjórn

Fyrri framkvæmdarráð og núverandi stjórn var ljóst að ekki yrði sama fjármagn til umráða og til var í sjóðum fyrir fyrri kosningar. Lagður hafði verið því grunnur fyrir að það starfsfólk sem við hefðum ráð á að hafa í launuðum störfum fyrir Pírata, gæti því sinnt mikið af þeirri vinnu sem áður hefur verið keypt utanaðkomandi aðstoð fyrir.

Teljum við að við séum mjög lánsöm með það hæfileikafólk sem starfar fyrir flokkinn.

Kosningastjórn

Ekkert er um kosningarstjórn í lögum Pírata og taldi Framkvæmdarstjórn að það hefði ekki heimild til að stofna slíka stjórn ein og sér. En samkvæmt lögum félagsins eru það í raun aðildarfélögin sem sjá um hvernig fyrirkomulag kosninga er í hverju kjördæmi.

Leitað var því til aðildarfélaga og tók Framkvæmdarstjórn samkvæmt lögum við hlutverki aðildarfélaga sem ekki voru með virka stjórn.

Samkomulag náðist um fyrirkomulag kosningarstjórnar sem mundi starfa náið með frambjóðendum og öðrum stjórnnum félagsins.

Áhrif Covid-19 á Framkvæmdastjórn

Faraldurinn hefur sett svip sinn á árið eins og árin 2019-2020. Málefnnastarf Pírata hefur nánast eingöngu farið fram í fjarfundum og Pírataþingið og aðalfundur félagsins 2020 voru líka í fjarfundi eingöngu. Þetta hefur ekki komið í veg fyrir að málefnnastarfið hafi verið mikið og fjöldi funda hefur jafnvel verið meiri en í venjulegu árferði. Þegar nær dró kosningum var síst minna af fundum svo hægt væri að klára mikilvægar stefnur fyrir kosningabaráttuna og svo nýja kosningastefnuskrá, sem Stefnu- og málefnanefnd hefur staðið að ásamt Pírataþingunum.

Komandi tímar munu skera úr um hvort það þurfi enn svo marga fjarfundi eða hvort það megi blanda þessum fundarformum saman en það er augljóst að Píratar búa nú yfir mikilvægri reynslu við að halda úti málefnnastarfi á netinu og hefur þetta aukið og bætt starfið. Vonin er sú að þetta mikilvæga starf haldi áfram hvað sem faraldrinum líður.

Á þessum tímum hefur framkvæmdastjórnin fundað í eigin persónu þegar aðstæður leyfðu en aðallega á fjarfundum. Stundum hefur þessum fundarformum verið beitt eftir hentisemi til að tryggja allir komist á fundina. Fyrir kosningarnar núna í haust hefur stjórnin svo fundað vikulega, ýmist í hádeginu eða síðdegis.

Skýrsla frá stefnu- og málefnanefnd

Kosið var í stefnu- og málefnanefnd Pírata (hér eftir SMN) í fyrsta sinn á aðalfundi félagsins í september 2020. Fulltrúar nefndarinnar eru Eva Pandora Baldursdóttir, Arndís Anna K. Gunnarsdóttir, Valgerður Árnadóttir, Pétur Óli Þorvaldsson og Mörrður Áslaugsson. Nefndin hóf strax að funda vikulega og byrjaði á því að skilgreina hlutverk sitt út frá nýsamþykktum lögum Pírata og koma sér saman um áherslur og verkefni. Strax frá byrjun var góður andi meðal fulltrúa og samhljómur um hvernig við ættum að haga störfum okkar. Nefndin skipti með sér verkum á þann hátt að Eva Pandora er formaður og Arndís Anna ritari.

Fyrsta verkefni nefndarinnar var umhverfisþing sem haldið var að ósk og í samráði við þingflokkin. Á þingið mættu sérfræðingar í umhverfis- og loftslagsmálum. Þingið var rafrænt og heppnaðist vel. Í anda þess var einnig haldinn rafrænn pallborðsfundur um Nýju Stjórnarskrána. Frummælendur voru Katrín Oddsdóttir og Jón Ólafsson og flutti Helgi Hrafn Gunnarsson lokaræðu. Niðurstöður umhverfisþings voru meðal annars á þann hátt að vilji var til þess að uppfæra landbúnaðarstefnuna í grænni átt og aðstoðaði SMN við þá vinnu og var sú vinna viðamikil. Vinnan gekk vel með mikilli þátttöku grasrótar en þarna varð ljóst að SMN gat ekki verið drifkrafturinn í einstaka stefnumálum því það myndi taka of mikinn tíma nefndarinnar og yfirtaka hlutverk grasrótar. Fráfarandi nefnd mælist með að frekar sé SMN einstaklingum innan grasrótarinnar til aðstoðar við stefnumótun í einstaka málefnum. Eftir mótun samþykkt nýrrar landbúnaðarstefnu var það verklagið sem SMN fylgdi og aðstoðaði nefndin grasrót við mótun nokkurra stefna eftir það.

Árið 2021 var kosningarár þannig eftir áramót fóru nefndin að fullum þunga í gerð af kosningastefnuskjár. Ákveðið var að leita til grasrótarinnar með Pírataþingi í febrúar. Það var notast við Opið rými. Opið rými er fundaform sem kallast á ensku Open Space Technology. Helsta einkenni þessarar aðferðar er að í upphafi þá vantar dagskrá, sem gefur þátttakendum það frjálsræði að búa hana til sjálfir. Hugmyndin með opnu rými er sú að þegar hópur fólks kemur saman til að ræða ákveðið málefni, þá sé leiðin til að fá bestu útkomuna sú að setja upp ramma fyrir umræðu hópsins sem er eins lítið heftandi og mögulegt er, setja umræðuna í gang og láta fólk stýra sér sjálft eftir það. Í lok þingsins var deilt út stigum á málefnið og hófst áframhaldandi vinna með þau málefni sem hlutu hæstu forgangsöröðun þingsins. Þau sem stungu upp á hverju málefni var ábyrgðarfólk þeirra og leiddu málefnaþópa sem unnu áfram með málefnið. SMN hafði yfirsýn yfir þessum málefnaþópum en tók ekki beinan þátt í þeim.

Nefndinni bárust margar ábendingar frá grasrót um hvernig væri hægt að bæta ferlið og reyndi nefndin að verða við þeim ábendingum. Niðurstaða þeirra breytinga varð til þess að kosningastefnan varð betri og áreiðanlegri. Þar sem vinnulag breyttist samkvæmt ábendingum á meðan vinnan fór fram náðist ekki að birta vinnuáætlun fram í tíman.

Á Pírataþingi II var áætlað að málefnaþóparnir myndu skila af sér vinnu sinni en sökum þess að margir hóparnir höfðu ekki haft nægan tíma til að ljúka sinni vinnu var ákveðið að ræða málefnið nánar á þinginu án þess þó að ljúka vinnunni og gefa þannig málefnaþópunum rýmri tíma til að ljúka vinnu sinni. Þegar leið á sumarið gekk málefnavinnan hægar þar sem fáir meðlimir málefnaþópanna héldu fullri virkni. Þá stigu frambjóðendur og starfsfólk inn í vinnuna og tóku við

henni af sjálfbærliðunum. Málefningur var bætt við og unnið áfram með þann grunn sem grasrótin hafði lagt. Niðurstaðan var kosningastefna sem Píratar geta verið stolt af.

Það helsta sem nefndin tók sér til lærdóms af ferlinu var að þó að það hefði ótvírætt verið kostur að vera sveigjanleg og bregðast við ábendingum grasrótar þá ætti áframhaldandi vinnu að vera hagað á þann hátt að unnið verði eftir áætlun þar sem grasrót er gert ljóst hvar, hvenær og hvernig þau geta tekið þátt.

Eftirfarandi er tillaga að áætlun við mótun kosningastefnu:

1. Pírataþing I - Open Space aðferðin notuð til að sjá hvaða málefni grasrótin vill setja á oddinn.
2. Málefnaþing - Ábyrgðaraðili tilnefndur í hverjum málaflokki sem heldur utan um opna fundi um málefnið. Hver hópur fær verklagsreglur og sniðmát. Ábyrgðaraðili er í sambandi við SMN um framgang mála.
3. Pírataþing II - Tækifæri grasrótar til að ræða um vinnu málefnaþinga hingað til.
4. Málefnaþing - Tímabil þar sem málefnaþingarnir geta brugðist við þeirri umræðu sem var á Pírataþingi II og tekið tillit til athugasemda.
5. Frambjóðendur - Grasrót afhendir frambjóðendum niðurstöður starfsins. Frambjóðendur koma sér saman um drög að kosningastefnu sem fer í kosningakerfi Pírata.

Skýrsla frá fjármálaráði

Nýtt fjármálaráð var kosið í fyrsta sinn á aðalfundi Pírata 2020. Þannig komu Albert, Stefán og Valborg fersk að fjármálum Pírata, sem áður voru í höndum gjaldkera framkvæmdaráðs félagsins. Fundir fjármálaráðs voru allir haldnir á vefnum og fundargerðir gerðar aðgengilegar á vefsíðum félagsins.

Fjármál félagsins voru ágæt og félagið kom út á núlli í lok árs 2020, hafði þá náð sér eftir skuldir fyrri kosninga og nokkuð dýra starfsmannaveltu fyrri ára. Nýtt fjármálaráð einbeitti sér því að undirbúningi kosningaársins 2021 og óskaði fljótlega eftir fjárhagsáætlunum aðildarféлага, nýrrar framkvæmdastjórnar og stefnu- og málefnanefndar.

Einnig var rýnt í ársreikninga Pírata og fundað um bókhald fyrri ára til að átta sig á því hvernig fjármálaáætlun kosningaársins 2021 gæti litið út. Með aðstoð framkvæmdastjóra Pírata og bókkara félagsins varð til yfirlit yfir fjármál fyrri ára sem grundvöllur þess að birta opið bókhald eins og lög Pírata gera ráð fyrir, um leið og góð sýn yfir áætlun fyrir kosningar varð til.

Á sama tíma var unnið að verklagsreglum um bókhald og fjármál Pírata og voru þær kynntar grasrót og öðrum stjórnun félagsins í febrúar 2021. Þar kemur meðal annars fram hvernig framkvæmdastjóri og gjaldkeri framkvæmdastjórnar skuli vinna saman, hvernig opnu

bókhaldi skuli háttað og fjárveitingum til kjördæmisfélaga. Auk þess var bætt við kafla með leiðbeiningum til gjaldkera kjördæmis- og aðildarfélaga.

Fjármálaáætlun var einnig birt í febrúar 2021, byggt á bókhaldsliðum fyrri ára ásamt áætlunum frá kjördæmisfélögum og öðrum stjórnnum Pírata. Í áætluninni kom fram að miðað við áætlaða innkomu félagsins færu um 46 milljónir króna í almennan rekstur og starfsmannahald en lögðum til að reynt yrði að spara og draga saman seglin í daglegum rekstri til að ná þeim kostnaði nær 42 milljónum króna. Svo færu 28 milljónir í miðlægt kosningastarf og um 12 milljónir í kosningastarf kjördæmisfélaga. Upphaflega var áætlað að allt að 15 milljónir gætu farið í þann kostnaðarlið og úthlutað yrði eftir reiknireglu en áætlanir sem bærust ráðinu voru ekki fyrir nema 12,23 m.kr. Að peningum skyldi úthlutað svona beint til aðildarfélaga var nýtt af nálinni, en forsenda fyrir þeirri ákvörðun var sú að í lögum Pírata (gr. 13.1) er talað um að ábyrgð kosningastarfs sé á höndum aðildarfélaganna en í ljósi sögunnar fannst okkur vissara að taka frá fjármagn fyrir stórum miðlægum sjóði.

Eftir fyrsta starfsár okkar erum við í fjármálaráði ánægð með árangurinn, en þykir þó vanta lagalegt umboð til að geta sinnt raunverulegu eftirlitshlutverki í fjármálum. Nú eru þau gögn sem ráðið hefur aðgang að ætíð nokkurra mánaða gömul og búin að fara áður um hendur framkvæmdastjóra og bókara. Þannig hefur ráðið ekki yfirsýn yfir stöðu fjármála á hverju sinni og getur ekki uppfært fjármálaáætlun þegar þörf krefur eða birt opið bókhald ársfjórðungslega nema löngu seinna. Fjármálaráð mun leggja til lagabreytingar til að skerpa á aðgangi þess að fjármálagögnum og reikningum félagsins.

Skýrsla stjórnar PÍR starfsárið 2020-2021

Stjórn PÍR starfsárið 2020-2021 skipa Guðjón Sigurbjartsson, formaður, Jason Steinsson, ritari, Jón Ármann Steinsson, gjaldkeri og Alexander Kr. Gústafsson, meðstjórnandi. Stjórnin hefur verið starfsöm og samheldin. Stefnt er að stjórnarkjöri og aðalfundi í október.

Helstu verkefni þetta starfsárið eru eftirfarandi.

Borgarbylting

Málefnafundir um helstu málefni sem koma til kasta sveitarfélaga, með framsögu borgarfulltrúa og sérfræðinga og almennum umræðum á eftir.

Borgarbyltingar fundaröðin byrjaði á starfsári fyrri stjórnar. Víðtæka ánægja var með framtakið og því var haldið áfram á þessu starfsári:

- **Íbúalýðræði og gagnsæi**
- **Nýtt aðalskipulag Reykjavíkur**

Þessi stjórn hefur staðið að fundum um:

- Þjónusta við aldraða
- Gæði skólastarfs í höfuðborginni
- Snjallvæðing Reykjavíkur - Þjónusta fyrir fólk fyrst og fremst / fólk í fyrirrúmi
- Sár fátækt (í Reykjavík og á höfuðborgarsvæðinu).

Fundir þessa starfsárs hafa verið netfundir en fundir fyrri stjórnar voru í Tortuga. Reynslan af netfundum er nokkuð góð. Mikil ánægja hefur verið með þetta starf hjá borgarfulltrúunum og almennt innan PÍR.

Undirbúningur alþingiskosninga

Í nóvember hóf þessi, þá nýkjörna stjórnin undirbúning fyrir alþingiskosninga með því að yfirfara prófkjorsreglur fyrir kjördæmið. Haldnir voru sameiginlegir fundir með stjórnnum annara kjördæma um kosningaundirbúning. Prófkjorsreglur voru samræmdar að talsverður leyti og tímasetningar fyrir undirbúninginn að talsverður leyti. Prófkjörin fóru svo fram í febrúar – mars og í framhaldinu annar undirbúningur.

Kosningastjórn

Í framhaldi af vinnu við samræmingu prófkjorsreglna varð samstarf milli kjördæmafélaga um fleira sem varðar undirbúning Alþingiskosninga, sem stjórn PÍR átti að sumu leyti frumkvæði að og tók að sjálfsögðu þátti í. Þar á meðal var fyrirkomulag kosningastjórnunar mótað. Stjórn PÍR samdi tillögur að skipulagi á þessu sviði. Tillögurnar fengu talsverða umfjöllun. Eftir all nokkrar breytingar var að lokum samþykkt skipulag fyrir kosningabaráttuna og myndun kosningastjórnar sem hóf störf með vorinu.

Kosningastjórn er skipuð fulltrúum fá kjördæmafélögum, fulltrúm frambjóðenda hvers kjördæmis og launuðu starfslíði Pírata. Stjórnin annast yfirstjórn kosningabaráttunar og hittist reglulega á netfundum auk þess sem launaðir starfsmenn vinna að verkefnum milli funda. Almennt virðist fólk sem hefur verið virkt í innra starfi Pírata, á því að vel hafi tekist til um skipulag og undirbúning kosningabaráttunnar.

Reykjavík í miðri viku

Á prófkjörstímabilinu var eðlilega mikill áhugi á starfinu og verður vonandi í aðdraganda kosninganna. Fram komu hugmyndir vikulega netfundi þar sem grasrótin og frambjóðendur gætu spjallað um málefni kjördæmisins og landsins. Settir voru upp netfundir á fundir.piratar.is/reykjavik á miðvikudagskvöldum kl. 20. Þangað geta allir mætt sem hafa áhuga og tíma til að spjalla saman.

Aðalfundur

Stefnt er að næsta aðalfundi eftir kosningar, í október n.k. Áhugasamir um málefni PÍR eru hvattir til að bjóða sig fram til stjórnarþátttöku.

F.h. stjórnar PÍR

Guðjón Sigurbjartsson

Ný heimasíða Pírata

Heimasíða félagsins þótti orðin úr sér gengin í byrjun árs 2019 og var öðrum af tveimur PR starfsmönnum fengið það verkefni að hanna nýja síðu, og var ákveðið að hanna sk. statíska síðu í Jekyll. Í ársbyrjun 2020 hafði mikið fjármagn farið í þetta verkefni (meðal annars með ráðningu forritara) en þó var síðan ekki nálægt því að vera birtingarhæf. Þegar PR starfmaðurinn lét af störfum þótti ljóst að verkefnið næði ekki lengra, og ákveðið að byrja uppá nýtt með WordPress síðu. Sjálfboðaliðar innan Pírata tóku við Jekyll síðunni og munu þróa hana áfram í innri vef.

Róbert Douglas upplýsingastjóri og Inga Dóra Guðmundsdóttir sjálfboðaliði hófust handa við að hanna nýja síðu og leita að vefsmið til að setja upp síðuna í maí/júní 2020.

Nýja síðan átti að vera frábrugðin þeirri eldri að fréttir af starfi Pírata væru í forgrunni, síðan væri auðvelt að nálgast allar upplýsingar um hreyfinguna og hvernig mætti leggja flokknum lið og skrá sig í hann. Nokkurn tíma tók að finna réttu manneskjuna en á endanum var gerður samningur við Sunnu Einarsdóttur um vinnuna, og hófst hún handa í júlí. Vinnan gekk bæði hratt og vel en samningurinn kláraðist því miður áður en síðan kláraðist og ekki fékkst fjármagn fyrir meiri vinnu. Það féll því í skaut Róberts að klára síðuna, og hefur hann unnið að því með Ingu Dóru samhliða því að sinna öllum PR verkefnum skrifstofunnar. Síðan var síðan sett í loftið í desember 2020.

Afurðin er glæsileg heimasíða sem sameinar fréttir, fróðleik og nauðsynlegar upplýsingar um Pírata ásamt viðburðadagatali og nýjunginni Píratar.tv sem er streymisveita Pírata. Endilega lítið við sem fyrst á: Piratar.is

Áhrif Covid á skrifstofu Pírata og starfsfólk

Kórónuveirufaraldurinn með tilheyrandi samkomubönnum hafði mikil áhrif á starfsemi Pírata rétt eins og annarra. Undirbúningsfundum framkvæmdastjóra með kjördæmafélögum sem voru áformaðir um vorið var slegið á frest, en þegar leið á ástandið voru fundirnir færðir í rafrænt form. Sjálfboðaliðar í innra starfinu allt að því hurfu á tímabili og fólk var skiljanlega önnur kafið við að endurskipuleggja eigin hversdagsleika. Það hafði í för með sér töluverðan sparnað í mat og drykk á viðburðum og við vinnu í Tortuga, en þýddi líka að enn meira álag varð á starfsfólk.

Lokaorð

Píratar er hreyfing sem er komin til að vera, við mælumst sterk í skoðanakönnunum og uppskerum vel í kosningum því við vinnum vel og heiðarlega. Við höfum staðið sterk saman á þessu ári þó að við höfum ekki getað deilt sama rými oftast nær, enda hefur tækni-og internetflokkurinn Píratar staðist þá þolraun að skipuleggja okkur og funda alfarið á netinu. Flest okkar hafa þó fundið hvað það er mikilvægt að geta hist reglulega í kjötheimum og deilt skoðunum og spjallað um málefni.

Nú sér fram á bjartari tíma, sem er þó hulin óvissu en eitt er víst: Píratahreyfingin mun halda áfram að vaxa og dafna. Það sést á árangri okkar hingað til og svo því að við höfum ekki gleymt kjarna hreyfingarinnar og flokksins, sem er að finna í Grunnstefnunni og Píratakóðanum. Það eru okkar helstu leiðarvísar ásamt nýjustu og bestu upplýsingum sem völ er á, á hverjum tíma. Vönduð og gegnsæ vinnubrögð er enda hvernig Píratar vinnum og það hefur reynst okkur farsælt.